

氏族典第五百四十卷

翟姓部彙考

廖用賢尙友錄

翟姓

翟南陽徵音黃帝之後代居翟以地爲氏

翟姓部列傳

周 翟璜

按尙友錄璜下邳人魏文侯與士大夫坐問曰寡人何如君也皆曰君仁君也翟璜曰君非仁君也文侯怒問任座對曰仁君也曰子何以知之對曰臣聞之其君仁者其臣直向璜之言直是以知也文侯曰善復召璜爲上卿

漢 翟盱

按漢書功臣表盱以漢王二年爲燕令以都尉下楚九城封衍侯十二年薨諡簡

翟山

按漢書功臣表高后四年祇侯山嗣二年薨

翟嘉

按漢書功臣表高后六年節侯嘉嗣四十四年薨

翟不疑

按漢書功臣表建元三年侯不疑嗣元朔元年坐挾詔書論耐爲司寇

翟光

按漢書功臣表元康四年盱元孫陽陵公乘光詔復家

翟公

按尚友錄公下邳人文帝時爲廷尉賓客填門及罷門外可設雀羅後復用賓客欲往公大署其門曰一死一生乃知交情一貧一富乃知交態一貴一賤交情乃見

翟方進

按漢書翟方進傳方進字子威汝南上蔡人家世微賤至方進父翟公好學爲郡文學方進年十二

三失父給事太守府爲小史數爲掾史所詈辱從汝南蔡父相蔡父大奇其形貌謂曰小史有封侯骨當以經術進方進喜因病歸辭後母欲至京師受經母憐其幼隨之長安織屨以給方進讀經博士受春秋積十餘年經學明習以射策甲科爲郎舉明經遷議郎轉博士遷朔方刺史有威名遷丞相司直旬歲間免兩司隸朝廷由是憚之丞相宣甚器重焉上以爲任公卿徙京兆尹坐太皇太后喪煩擾百姓左遷執金吾遂擢爲丞相封高陵侯以災異賜詔書自殺上祕之冊贈丞相高陵侯印綬天子臨弔諡曰恭

翟宣

按漢書翟方進傳宣方進長子字太伯明經篤行君子人也及方進在爲關都尉南郡太守嗣侯坐弟義起兵死

翟義

按漢書翟方進傳義方進少子字文仲少以父任爲郎遷諸曹出爲南陽都尉以法縛宛令劉立威震南陽後坐法免起家弘農太守遷河內太守青州牧所居著名徙東郡太守王莽居攝義舉兵立

東平王雲子信爲天子義自稱大司馬柱天大將軍誅莽兵敗死

翟牧 翟兄

按尙友錄牧蘭陵人有子曰兄

按漢書儒林傳孟喜從田王孫受易喜授同郡白光子沛翟牧

子兄皆爲博士繇是易有翟孟白之學

後漢 翟酺

按後漢書翟酺傳酺字子超廣漢雒人也四世傳詩酺好老子尤善圖緯天文歷算以報舅讎當徙日南亡于長安爲卜相工後牧羊涼州遇赦還仕郡徵拜議郎遷侍中拜尙書時安帝始親政事追感祖母宋貴人悉封其家又元舅耿寶及皇后兄弟閭顯等並用威權酺上疏諫書奏不省而外戚寵臣咸畏惡之延光三年出爲酒泉太守叛羌鈔郡界酺赴擊斬首九百級遷京兆尹順帝卽位拜光祿大夫遷將作大匠損省經用歲息四五千萬屢因災異多所匡正由是權貴共誣酺交通屬託坐減死歸家復被章云酺前與河南張楷等謀反逮詣廷尉及杜真等上書訟之事得明釋卒於家

晉 翟湯

按晉書翟湯傳湯字道深尋陽人篤行純素仁讓廉絜不屑世事耕而後食人有餽贈雖釜庾一無所受永嘉末寇害相繼聞湯名德皆不敢犯鄉人賴之康帝以散騎常侍徵湯固辭老疾不至年七十三卒於家

翟莊

按晉書翟湯傳湯子莊字祖休少以孝友著名遵湯之操不交人物耕而後食語不及俗惟以弋釣爲事及長不復獵或問漁獵同是害生之事而先生止去其一何哉莊曰獵自我釣自物未能頓盡故先節其甚者晚節亦不復釣端居華門歡菽飲水州府禮命及公車徵並不就年五十六卒子矯亦有高操屢辭辟命矯子法賜

翟超

按萬姓統譜超山陽太守

宋 翟法賜

按宋書翟法賜傳法賜尋陽柴桑人也曾祖湯湯子莊莊子矯並高尚不仕矯生法賜少守家業立

屋於廬山頂喪親後便不復還家不食五穀以獸皮結草爲衣雖鄉親中表莫得見也州辟主簿舉秀才右叅軍著作佐郎員外散騎侍郎並不就後家人至石室尋求因復遠徙後卒於巖石之間

梁 翟子榮

按德安府志子榮梁武帝太清三年爲德安太守

北魏 翟黑子

按魏書高允傳遼東公翟黑子有寵於世祖奉使并州受布千疋事尋發覺黑子請計於允允曰公帷幄寵臣答詔宜實又自告忠誠罪必無慮中書侍郎崔覽公孫質等咸言首實罪不可測宜諱之黑子反怨允曰如君言誘我死遂與允絕以不實對竟爲世祖所疎獲罪戮

隋 翟普林

按隋書翟普林傳普林楚丘人也性仁孝事親以孝聞州郡辟命皆固辭不就躬耕色養鄉鄰謂爲楚丘先生後父母疾親易燥濕不解衣者七旬大業初父母俱終哀毀殆將滅性廬於墓側負土爲墳盛冬不衣繒絮唯著單縗而已家有一犬普林哀臨犬亦悲號有二鵲巢其廬前柏樹每入廬馴

狎無所驚懼大業中司隸巡察奏其孝感擢授孝陽令

翟乾祐

按尙友錄乾祐有道術以考召著名雲安一邑江流之險十有五處一日召其灘神使平之至者十四最後至乃一女人曰沿江小民藉江流之險爲人挽負以資其生豈可平也於是命灘神悉復其險

唐 翟璋

按萬姓統譜璋陝州刺史

後梁 翟景珂

按五代史翟光鄴傳光鄴父景珂倜儻有膽氣梁晉相距於河上景珂率聚邑人守永定驛晉人攻之踰年不能下景珂卒戰死

後晉 翟進宗

按五代史翟進宗傳進宗不知其何人也初事唐後事晉爲淄州刺史楊光遠反以騎兵數百脇取

至青州而進宗不屈光遠遂殺進宗出帝贈進宗左武衛上將軍光遠平詔求進宗尸加禮歸葬葬事官給以其子仁欽爲東頭供奉官

後周 翟光鄴

按五代史翟光鄴傳光鄴字化基濮州鄆城人也時年十歲爲晉兵所掠明宗愛其穎悟常以自隨光鄴事唐官至耀州團練使晉高祖時歷棣沂二州刺史西京副留守出帝以光鄴爲青州防禦使光鄴招輯兵民甚有恩意漢高祖入京師改右領軍衛大將軍充街使周太祖入立拜宣徽使樞密副使出知永興軍卒於官光鄴爲人沈默多謀事繼母以孝聞

宋 翟守素

按宋史翟守素傳守素濟州任城人父溥晉左司禦率府率守素以父任爲殿直歷漢周遷供奉官領承天副使乾德中爲引進副使從王全斌伐蜀蜀平擢判四方館開寶三年命爲劍南十州都巡檢使太平興國三年錢俶獻浙右之地詔守素爲兩浙諸州兵馬都監安撫諸郡人心甚悅卽以知杭州歲滿爲西京巡檢使雍熙二年改知延州四年留充天雄軍兵馬鈐轄知大名府改知潞州會

建方田命爲代北方田都部署并州兵馬鈐轄從屯夏州改知鳳翔府淳化中夏帥趙保忠上言其弟繼遷誘戎人爲寇宜求援師詔守素率兵復屯夏州未幾又徙石州以老病上疏求歸本郡從之三年卒年七十一守素逮事四朝縣歷內職五十餘年性謹慎寬仁容衆所至有治績

翟守珣

按萬姓統譜守珣太祖時爲李重進親吏重進移鎮青州謀舉兵遣守珣往潞陰結李筠守珣識太祖往還京師潛詣樞密承旨李處耘求見太祖太祖厚賜守珣

翟汝文

按宋史翟汝文傳汝文字公巽潤州丹陽人登進士第以親老不調者十年擢議禮局編修官召對徽宗嘉之除祕書郎遷起居郎皇太子就傅命汝文勸講除中書舍人出知襄州移知濟州復知唐州召拜中書舍人外制典雅一時稱之出守宣州召爲吏部侍郎出知廬州徙密州欽宗卽位召爲翰林學士改顯謨閣學士知越州兼浙東安撫使紹興元年召爲翰林學士兼侍講除叅知政事同提舉修政局時秦檜相怒劾汝文專擅罷去以卒先是汝文在密檜爲郡文學汝文薦其才故檜引

用之然汝文性剛不爲檜屈對案相詰至目檜爲濁氣汝文風度翹楚好古博雅精於篆籀有文集行於世

翟興

按宋史翟興傳興字公祥河南伊陽人少以勇聞劇賊王伸起興與弟進應募擊賊號大翟小翟金人犯京師西道總管王襄檄興統領在城軍馬以保護陵寢功補承信郎辟京西北路兵馬副鈐轄爲陝西宣撫司前軍統制會進爲叛將陽進所害明年愬進死事於朝以興代進爲京西北路安撫制置使兼京西北路招討使兼知河南府楊進屯鳴臯山北興與子崇帥鄉兵時出擾之進中流矢死餘衆潰去西京平金人犯永安軍興遣子崇與博戰屢捷追至澠池詔授河南孟汝唐州鎮撫使兼知河南府轉武略大夫兼閤門宣贊舍人寓治伊陽金人入陝右遣將邀擊俘五十餘人又遣子崇生擒金河東都統保骨遂復陽城縣鄧州人楊某擁衆河北僞稱信王興遣將董先追獲於商州殺之進武功大夫忠州團練使劉豫將遷汴以興屯伊陽憚之陰遣人啗裨將楊偉以利偉殺興攜其首奔豫事聞贈保信軍節度使子崇沉勇有父風繼興爲鎮撫使琳閤門祇候

翟進

按宋史翟興傳興弟進字先之以捕盜勞補下班殿侍累功充京西第一將金人逼靈山砦進父子兄弟與之戰潰圍至高都集鄉兵七百人夜行晝伏五日至洛城夜半破關入擒高世由再捷於伊陽白草塢授武義大夫閤門宣贊舍人屢與金人夾河戰乘勝入洛陽金人聚懷衛蒲孟數州之衆薄城下斧諸門入進率士卒巷戰次子亮死之遷武功大夫充京西北路兵馬都鈐轄尋授馬步軍副總管陞本路制置使會楊進遣數百騎絕水犯進營進乘半渡擊之追賊數十里破賊四砦馬驚墜塹爲賊所害贈左武大夫忠州刺史官其後五人

翟亨

按萬姓統譜亨歸善人事母孝鄉人呼爲翟夫子

翟傑

按廣州府志傑東莞人自少負才名篤孝友紹興乙卯成進士司戶化州育士愛民教養兼致數年而州稱治及丁艱居邑凡事屬艱鉅一意維持邑人德之卒祀於本學思賢堂子僖孫卷石俱登進

士有行誼政聲

翟國榮

按景陵縣志國榮咸淳八年九月爲復州副將與元人戰於瀾泥湖兵敗死之

金 翟永固

按金史翟永固傳永固字仲堅中都良鄉人歸宋宋人以經義兼策取士永固中第一授開德府儀曹叅軍金破宋永固北歸中天會六年詞賦科授懷安丞遷望雲令補樞密院令史攝左司郎中歷同知清州防禦使入爲工部員外郎正隆二年遷翰林學士承旨與直學士韓汝嘉俱召至內殿問以將親伐宋事永固對曰宋人無釁隙伐之無名縱使可伐亦無煩親征遣將帥可也由是大忤海陵意永固卽請致仕歸臥於家大定二年起拜尙書左丞請依舊制廉察官吏革正隆守令之汙從之明年表乞致仕詔不許罷爲眞定尹五年懇乞致仕許之六年薨

元 翟文彬

按保定府志文彬滿城人以武功顯

翟居德

按興國州志居德字安常金臺人爲本郡錄事參軍遇旱請禱霖雨沛然居官廉勤卓有政績

翟思誠

按淄川縣志思誠淄川人母病思誠日夜侍湯藥衣不解帶母死廬墓三年

翟耆年

按鎮江府志耆年字伯壽丹陽人汝文子以父任入官好古文性孤介不苟合自謂爲吏必以懲罷棄官歸著書自娛

翟復

按南康府志復至正四年爲都昌丞遇歲旱恆切己憂每禱卽雨建興孝園以收不能葬者父老爲立碑頌之

明 翟益

按萬姓統譜益洪武中任平原縣丞廉聲大著尋陞按察司僉事持法公平

翟祥

按蘇州府志祥字君瑞嘉定人少通易學爲太祖占候皆驗賜以勅命爲訓術所著有希微子簡易錄

翟聚

按祥符縣志聚祥符人性至孝嘗割肉以愈母病洪武二十年以孝廉舉授行人母沒廬墓哀毀踰禮終直隸臨淮丞有司表揚之

翟昌甫

按萬載縣志昌甫萬載人家貧樂道喜讀書後以人才辟舉爲郎官

翟善

按泰興縣志善字敬甫泰興人聰穎異常十歲補邑諸生選入監授主事轉員外高皇帝察其可用超拜吏部侍郎進家宰每有大議必首被顧問奏對皆稱旨因以良佐目之

翟溥福

按萬姓統譜溥福字本德東莞人永樂進士任知青陽縣尋陞知府咸有惠政爲江西第一郡守致仕去家事蕭然清貧自甘

翟迪

按廣西通志迪山東淄川人永樂間知慶遠府以寬簡得衆心

翟整

按明一統志整永樂初知南樂縣在任興補廢墜孜孜不輟爲政務寬平後致仕

翟弁

按涇陽縣志弁涇陽人正統間舉人授寧陽知縣端謹慈祥民宜之時論謂不負科名云

翟繩祖

按廣州府志繩祖字從先少負奇節重然諾好讀書演撫李材以誣陷下獄繩祖伏闕上書訟其冤因得赦出繩祖與材素不相識其慷慨慕義若此

翟敬

按萬姓統譜敬字致恭大興人正統壬戌進士歷太僕寺卿

翟亨

按萬姓統譜亨九谿衛指揮僉事正統中以征蒙古及麓川功累遷指揮使後復征麓川偕其弟戰死朝廷遣官諭祭之

翟瑄

按萬姓統譜瑄字廷瑞洛陽人天順甲申進士歷尙書

翟通

按儀封縣志通字士亨儀封人成化間進士任戶部主事督轉輸徐州時歲饑通首疏請賑後累官至山東右叅政

翟鑾

按萬姓統譜鑾字仲鳴錦衣籍西卿人弘治乙丑進士改庶吉士歷武英殿大學士吏部尙書甲辰以子中式罷乙巳詔復冠帶隆慶初復職諡文懿有應制詞翰林院文集若干卷藏於家